

MONUMENTUM LITERARIUM
VIRO NOBILI EXCELLENTISSIMO
AC EXPERIENTISSIMO

DN. GEORGIO
KIRSTENIO,

Medicinarum Doctori, Pæda-
gogii Regii Profefori & Practico apud Steti-
nenses famigerabili

Ad diem 11 Martii Anno 215070v1az M DCLX.

Condigno exeqviarum honore mañtando,
cum invitatione

STUDIOSÆ GYMNASII NOSTRI
JUVENTUTIS

Ut decenti ordine funus
comitatum prodeant

constitutum

ab

HENRICO SCHÆVIO, M. D.

STETINI,

Typis GEORGII GOETSCHII, Reg. Pædag. Typogr.

ANNO M DCLX.



Ncidebamus, Juvenes dilecti, his diebus inter frugales summi Viri epulas in hoc sive Philosophema sive qverelam : quid intendat Deus & Natura quod infiniti prope homines nascantur, qui fati concedunt prius quam vel per ætatis infantiam se suaq; agnoscunt, vel ingentis laboris, cui per vitam omnem se manciparunt, opera pretium referunt : & ecce commodum se offert scævi augurii rumor, indicitq; exitium inter nos Medicum ac Professore GEORGIUM KIRSTENIUM insigne urbis & Lycei nostri ornamentum è vivis emigrasse. Nihil luculentius ad problema nostrum firmandum, nihil ad incerta casuum nostrorum comprobandum promptius. Certe Medicus, non quales se jactant rasores, vetulæ, fornacarii, sed qui publica artis & doctrinæ tropæa varie erexit, quiq; armatam morbis ac morti dexteram tam feliciter opposuit, ut & seriis latrinæcultoribus de gravissimis casuum respondere, & decumbentibus amplam salutis spem de se proderé possit, venerandam scientiam non in molli lecto invenit, sed inter ingentes vivacis ingenii contentiones, vigiles lucubrationes, difficiles peregrinationes, obscænas nauseas, tetros odores, abominabiles morosorum ægrorum squalores, deliras anicularum interpellationes, sinistros malevolorum rumores ad laudis & honoris sui culmen provectus est. Ita omne eruditionis latifundium ad Medicos pertinet, ut, quæ in omni scientiarum genere primas sibi vendicant, ab iis, non saltem ut ornamentum, sed velut necessarium requisitum, exigantur. Prætervehor variarum linguarum ad intelligendos artifices, qui in suo passim idiomate ingenii monumenta reliquerunt, cognitionem.

tionem. Quid vero iis ita familiare esse debet quam
 quæ solæ scientiarum nomine veniunt Physiologia & di-
 vina Mathesis? Qvot sylvas, prata, montes, dumeta perre-
 ptant priusquam in stirpium ac terra nascentium immen-
 sam varietatem intromittantur? Qvot lanienas & cadave-
 rum confectiones aggrediuntur, ut partium humani cor-
 poris munia, situs, nexus & conformationes ut suos ungues
 teneant? Quanta assiduitate Pharmacopœorū officinas fre-
 quentare debent, ut mineralium, succorum, resinarum,
 cæterorumq; primorum, & velut elementarium, facies,
 patriam & bonitates, per signa sua characteristica & gen-
 tilitias notas à spuriis, supposititiis & exoletis interno-
 scant? His vero omnibus pertinaci studio imbibitis, non
 callent ulterius quam ubi pueruli literarum nomina &
 picturas complexi. Tunc primum in virtutes ac idiomata
 eorum, qualitates primas, secundas, tertias & amplius, ma-
 nifestas & occultas, earumq; gradus, mansiones, latitudi-
 nes altius inquirendum. Hinc infinitæ commistiones,
 συγχύσεις præcipationes, sublimationes, reverberationes
 aliaq; sexcenta molimina, ut fiant catapotia, malagmata,
 eclegmata, spanadrapa, pessæ, dropaces, errhina, prarmica,
 marmeladæ, panchresta, & quæ porro sunt horrenda no-
 mina horrendis humani generis invaloribus opponenda.
 Verum nihil adhuc actum, quando de ipsis morborum pha-
 langis deq; variis eorum nomenclaturis, natalitiis, mor-
 ribus, incensu ac comitatu, quibus item indicibus à se invi-
 cem discriminantur immane quantum indagare ac perdi-
 scere restat. Qvorsum autem & illa? si non ad omnem
 hostium istorum occursum, modi, tempora, occasiones, ac
 vices armorum, quibus apte iis resisti possit, ita tenean-
 tur, ut non modo nociva tela averruncari, sed & de con-
 flictus eventu & ancipiti vitæ mortisq; alea velut quo-

dam augurio definitum quicquam prænunciari possit. An non vero hæc & multa alia, instar liberalis epigrammatis & mantissæ, in Defuncto nostro ultra vulgarem mensuram præluxerint, & annon inde senectâ Hippocraticâ, quam vegetum ad annum ætatis centesimum sexagesimum nonum deposuisse perhibent, dignus fuisset, ex ipsa vitæ ejus historia dispiciemus. Ingressus in hanc scenam est Sedini Pomeranorū Anno appropinquantis Salutis M. DC. XIII. die Januarii vicesimo, Patre viro Integerrimo Nicolao Kirstenio, pistorum ac dulciariorum Protostata & Ducibus Pomeraniæ à panificio, Matre foemina piissima Anna Löfflers. Cumq; sub ipsa pueritiæ teneritate parentibus ab erecta indole spem haud macram ostentaret, nihil ad ejus cultum non tentandum duxerunt. Traditus igitur primo fuit in disciplinam domesticam Dn. Andreæ Virginio hoc tempore SS. Theologiæ D. & Episcopo Revaliensi: cujus fidelem operam publica in Schola hac oppidana informatio, sub moderamine virorum celeberrimorum M. Loleji, & deinde D. Micralii, excepit. Ejus svasu, cum à sufficientibus primæ literaturæ rudimentis instructus esset, Illustre Hallensium Gymnasium, cui tunc præerat clarissimus Gveintzius, adiit, tanto cum studiorum emolumento, ut non modo Præceptorum amorem, sed & familiaritatem ad se traduxerit. His authoribus anno ætatis decimo septimo Academiam Lipsiensem accedere debuit: sed obstiterunt copiarum militarium discursiones, coëuntibus tunc in foedera nonnullis Germaniæ Ducibus. Declinavit igitur Jenâ, & lustratis quæ interveniebant celebrioribus quibusdam urbibus, Argentoratum amplexus est, ubi per quatuor solidos annos duravit. Non alia sedes viris in omni eruditionis pulvere versatissimis abundantior, nec ardentibus Defuncti desideriis accommoda-

modatior. In quovis disciplinarum genere generosos sibi
duces eligebat, à quorum ore & latere individuus pende-
bat. In Philosophia, non jejuna illa & in vocularum La-
byrinthis laborante, sed seria & quæ pectus exsaturat, fa-
cem præferebat Clarissimus Danhawerus : Medicinæ
splendorem de se largiebantur Sebizitus, Saltzmannus &
Karstadius Stetinenfis, qui cum ingenium Defuncti ad am-
plissimam artem, complectendum satis amplum deprehē-
derent, non destiterunt eū officiis & benefactis provocare,
quoad in suas partes eum pertraxisent. Ille mox tantis pa-
tronis se dignum præbuit, & præter alia solertiæ docu-
menta bis de cathedra accuratas theses semel de Lactati-
one & Lactis generatione deinde de Vulneribus capitis
publice defendit & auditorio satisfecit. Interim dum
ibi civem ageret, ad vicinam Academiam Tubingensem
cum Dn. D. Ludemanno & M. Scheningio digressus noti-
tiam præclarorum virorum, qui ibi degebant, sibi con-
quisivit. Sed mox ferale nuncium de obitu patris eum
ita perculit, ut rerum suarum penderet. Reddidit tamen
ipsi animum maternum auxilium, quod ei providæ patris
curæ, ne nobiles charissimi filii conatus interciderent,
per novissima destinaverant. Quæsiuit igitur alteram Ar-
gentinam eamque Lugduni Batavorum invenit, Viris Cla-
rissimis Dn. D. Thabore & Dnn. Oesleris Stetinenfis
iter ipsius stipantibus. Per sesquiannum ibi egerat, cum
fatale pestilentia malum excedere inde colonos juberet.
Hiemavit igitur Franeckeræ & Groningæ, ubi Freitag-
ium & Antonium Matthæi familiares & rebus suis insigni-
ter proficuos expertus est. Sub ineuntem astatem inaugu-
rationi Academiæ Ultrajectanæ interfuit. Inde Lugdunū
reversus felicem studiorum telam pertexuit D. Strypmanno
& Beringio commensalibus, hoc etiam contubernali: Ante-

cesforibus viris illustris doctrina Schrevelio, Heurnio, Falckenburgio, Walæo & Vorstio, sub quo tantos in Botanico studio progressus fecit, ut multis admirationi fuerit. Geminas ibi Disputationes auspiciis Walæi in publico habuit, alteram de symptomatibus visus & auditus; de olfactus & tactus alteram. Constituerat postquam quinquennium ibi absolvisset & viciniores Belgii provincias lustrasset, cæteras quoque regiones inspectare; sed revocavit ipsum per literas à proposito Dn. Christophorus Albinus Medicinæ D. & Practicus Stetinensis celeberrimus, suavitque ut Axioma in arte Medica summum ibi caperet. Secutus fuit viri amicissimi consilium, affixa solenni Disputatione de generatione lumbricorum in corpore humano, quam suo Marte & citra alterius præsidium tanto omnium applausu defendit, ut jam ad insignem famam gradum sibi conderet. Jam ipsi ad docendum aperiēbatur cathedra in Academia Gryphica, sed præcludebat ipsi ingressum inauspicata tempestas quæ tunc seculum concutiebat. Emanabat per eadem tempora de ejus eruditione celebratio Dorpatum, quo ad successionem Dn. D. Beloyii vocabatur: sed bellum Sveco Danicum eum & hoc proposito excludebat. Nec defuissent aliæ viæ quibus se publico probaret; verum matris precibus cesit ut in loco subsisteret, & gratia ac favore Illustrissimi Herois ac Cancellarii Regni Svecici Axelii Oxenstiernæ, in cujus laudes & virtutes concinnum carmen ad typos dedit, ad Professionem Medicam in Pædagogio Regio aspiraret. Obtinuit haud difficulter quod honeste ambierat, & jussu Serenissimæ Svecorum Reginae Christinæ Sparta illi datus est, non sine insigni juventutis nostræ fructu. Quicquid ad salutaris studii emolumenta faciebat per prælectiones Physicas, Medicas, Anthropologicas, Anatomicas, Botanicas

cas, nec non Disquisitiones Phytologicas, quarum pars lucem publicam vidit, pars per desidiū auditorum suppressa est, fideli manu porrexit. Præter hæc operam suam agris tanta fide contulit, ut jam ad ipsius excessum multa urbis pars lacrymis ac suspiriis ei parentet. Quantum ego de cæteris ejus dotibus judico, nescio an non inter paucos


Quos melior respexit in arbore Phæbus velut quidam choragus ac Triarius eminuerit. Quis ipso ingeniosior & quæ antiquitatis gratiam magis referebant tornabat carmina? Cui purior ab ore aut calamo fluebat dictio? Quis de omni eleganti literatura, quæ apud defæciora ingenia tantum diverti consuevit, accuratius ac tempestivius respondebat? Viva quædam ac ambulans bibliotheca erat, tam divite penū pectus distenderat. Cum vero mortalem se suaq; intelligeret, de extendenda ad posteros suos virtute cogitavit, atq; eo etiam fine ante octo annos maritale fœdus junxit cum pudicissima ac honestissima Virgine Elisabetha Dñi Christiani Röchlini civis ac mercatoris Prentzloviensis primarii filia, ex qua gemina profecit sobole, præmisq; ante annum filiola, solum filium à paterna consilio jam, prohdolor! desertum destituit. Nimum illa scire videtur quantam jacturam fecerit, ille feliicior qui nondum novit computare sua detrimenta. Ad ipsos potissimum pertineret hic inquirere quid sibi velit Deus T. Opt. M. quod virum domui suæ, urbi atq; publico ita salutarem in ipsa dierum suarum æstate subtraxerit. Sed quid sumus miseri? cui litigamus? cui dicam scribimus? Stat pro ratione voluntas sed paterna, sed optima, sed rebus nostris faventissima. Si ergo vivimus gratia est, si morimur beneficium. Quandiu supersumus gratulemur nobis quod digni habemur in vinea Domini laborare: evocamur? applaudamus dimissioni gratiosissima. Talem se gesit Defunctus.

Dum

Dum in his castris militavit hoc agebat: cum exauctorandus esset, hoc solum voluisse visus est. Cum enim anno abhinc nono ex acutissimo morbo morti jam naulū numeraret, cūq; nuperrime sub initiū mensis elapsi difficili affectu scorbutico tentaretur, non abiecit jugum, sed conformavit se ejus arbitrio à quo meliorem vitam exspectabat. In illam igitur translatus est die Martii 4. hora II. meridiana, arduo hoc evibrato Epiphonemate JUV A ò JESU! cum qvīntam septimanam quadragesimo septimo atatis anno adjecisset. Jam vos appello, Juvenes nostri, ut vobis & desertæ domui collugeatis, utq; nobiscum æstimetis non temere factum qvòd illud sapientiæ & eruditionis fanum qvòd Cellissimorum Ducum pietas erexit, qvòdq; Regalis gratia subinde recreavit, intra menses sexdecim duobus insignibus fulmentis Micrælio ac Kirstenio dispoliatum sit. Quis non videt quam in prono sit lapsus? Vos modo qvòd debetis, qvòdq; saltem potestis, Viro incomparabili novissima exequiarum officia exequimini. Valere.

Henr. Schævius, D.

Gymn. Reg. ProR.





987055 Bibliotheca 3.000,-
P.P. Camaldulensium in Bielany

Depozyt w Bibliotece Jagiellońskiej



10231

X. 11. 27

